

'Dakwaan gejala rasuah di KLIA

PM jamin adakan siasatan rapi

Anwar buat lawatan mengejut tinjau operasi imigresen, kastam di KLIA

Oleh Mohd Nasaruddin Parzi
bhnews@bh.com.my

Kuala Lumpur: Datuk Seri Anwar Ibrahim memberi jaminan siasatan rapi akan dibuat terhadap isu membabitkan kakitangan Jabatan Imigresen di Lapangan Terbang Antarabangsa Kuala Lumpur (KLIA), khususnya dakwaan wujud salah laku dan amalan rasuah.

Perdana Menteri yang mengadakan lawatan mengejut ke pintu masuk utama negara itu semalam berkata, secara umumnya, penugasan kakitangan imigresen dan kastam di KLIA, di Sepang berjalan dengan baik dan terkawal.

“Saya ingin bagi jaminan siasatan rapi akan dibuat. Tapi

umumnya majoriti petugas imigresen dan kastam berjalan dengan baik.

“Cuma ada beberapa masalah kita adakan siasatan untuk perbaiki atau kalau ada kesilapan, akan diambil tindakan sewajarnya.

“Saya cuba teliti langkah diambil setakat ini dan saya lihat imigresen buat respon yang sangat baik dan positif.

“Yang harus kita kenal pasti adalah kelompok kecil yang masih tidak mampu membawa perubahan, termasuk berdepan dengan beberapa pertuduhan. Siasatan rapi akan dibuat,” katanya dalam lawatan kira-kira 30 minit tanpa diiringi menteri Kabinet atau orang kenamaan.

Anwar berkata, perbincangan awal berkait beberapa isu dibangkitkan beberapa hari lalu akan dilakukan dalam mesyuarat Jemaah Menteri, Rabu ini.

Perdana Menteri semalam berada di KLIA bagi menyambut kedatangan Yang di-Pertuan Agong Al-Sultan Abdullah Ri'ayatuddin Al-Mustafa Billah Shah dan Raja Permaisuri Agong Tunku Azizah Aminah Maimunah Iskandariah yang selamat kembali ke tanah



Anwar berbual dengan anggota serta pegawai imigresen bertugas ketika melakukan tinjauan di KLIA, semalam.

(Foto ihsan Pejabat Perdana Menteri)

air selepas tunai ibadah haji.

Pesawat khas membawa Seri Paduka berdua dan delegasi tiba di Kompleks Bunga Raya, KLIA pada 1.10 tengah hari.

Beberapa hari lalu, tular gambar dan laporan mendakwa Menteri Pelancongan, Seni dan Budaya, Datuk Seri Tiong King Sing campur tangan dalam urusan ‘menyelamatkan’ seorang pelancong China sehingga mencetuskan kekecohan, namun dinafikan Ahli Parlimen Bintulu itu.

Kelmarin, King Sing tampil mempersoal siapa sebenarnya menyalah guna kuasa dalam kejadian itu, sama ada beliau atau pun pegawai imigresen bertugas.

King Sing sebaliknya mendakwa wujud amalan salah guna kuasa dan rasuah membabitkan sebilangan kakitangan imigresen yang bertugas di pintu masuk utama negara itu, sehingga me-

ngundang beberapa kenyataan penafian daripada kesatuan dan kakitangan yang mewakili agensi berkenaan.

Mengulas lanjut, Perdana Menteri berkata, dalam lawatan mengejut ke kaunter imigresen dan kastam di KLIA itu, beliau mendapati ada ruang untuk penambahbaikan bagi memantapkan pengoperasian di pintu masuk negara.

“Saya sempat bertegur sapa dan bertanyakan kepada anggota serta pegawai bertugas berkenaan operasi harian, baik di kaunter ketibaan mahupun pelepasan.

“Kesempatan ini juga digunakan untuk melihat sendiri isu berbangkit atau permasalahan sewaktu pengendalian harian membabitkan pelancong dan warga asing selain warga tempatan,” katanya.

Malah, Anwar berkata tindakan akan diambil terhadap pihak terbabit andai wujud kesilapan yang tidak sepatutnya sehingga menjejaskan kelancaran operasi.

“Insya-Allah tahap keselamatan dan pengoperasian di lapangan terbang negara akan senantiasa ditambah baik dalam memastikan perkhidmatan sewajarnya diberikan kepada semua pihak,” katanya.

Kelmarin, Ketua Pengarah Imigresen, Datuk Ruslin Jusoh berkata pihaknya akan menjalankan siasatan menyeluruh mengenai insiden itu, merangkumi semua aspek berkaitan.

Ketua Pesuruhjaya Suruhanjaya Pencegahan Rasuah Malaysia (SPRM), Tan Sri Azam Baki juga mengesahkan pihaknya akan memulakan siasatan dakwaan pegawai imigresen yang menjaga pintu masuk utama negara di KLIA terbabit dalam rasuah.